



Prevaranti ugrozili veliki izvozni posao

SIPA istražuje ko je sve Turskoj prodavao poljsko i rumunsko meso

Od 330 tona mesa koje je uvezeno iz Poljske dio se našao na turskom tržištu kao bosanskohercegovački proizvod

Istragu o izvozu mesa iz Bosne i Hercegovine u Republiku Tursku započela je Državna Agencija za istragu i zaštitu ljudi u BiH (SIPA) prošle godine.

-Državna agencija za istrage i zaštitu (SIPA) u prethodnom periodu, poduzimajući mjere i radnje iz svoje nadležnosti, postupala po predmetima koji se dovode u vezu s izvozom mesa u Tursku. U okviru toga prikupljena je određena dokumentacija iz Uprave za indirektno oporezivanje BiH, Ureda za veterinarstvo BiH, Agencije za označavanje životinja BiH i dr. Nakon analize prikupljene dokumentacije i izvršenih provjera, SIPA je Tužilaštvu BiH na dalje postupanje dostavila odgovarajući izvještaj o poduzetim mjerama i radnjama – saopćili su iz SIPA-e.

Prva adresa za podatke bila je Uprava za indirektno oporezivanje (UIO) BiH.

Izvoz od 100 miliona

-Carinska procedura izvoza obavljala se u nadležnim carinskim ispostavama gdje izvoznici imaju sjedište. Uz svu ostalu dokumentaciju neophodnu za carinjenje, izvoznici su kao dokaz o porijeklu mesa iz BiH prilagali potvrde koje su prethodno dobijali u Vanjskotrgovinskoj komori BiH. U toku 2015. godine UIO je na zahtjev SIPA-e dostavila statističke podatke o ukupnom uvozu mesa i jestivih klaoničkih proizvoda u BiH i izvozu istog izvan Bosne i

Hercegovine - rečeno nam je u UIO.

U BiH su se desile dvije ozbiljnije zloupotrebe dozvole za izvoz mesa u Tursku, rekao je za Faktor Vladimir Usorac, predsjednik Udruženja poljoprivrednih proizvođača RS-a. On navodi kako su telad i junad uvezena iz Rumunije i svježe meso iz Poljske prosljeđeni na tursko tržište, kao bh. proizvod.

-Od 330 tona svježeg mesa koje je uvezeno iz Poljske dio se našao na turskom tržištu kao bh. proizvod, dok je drugi dio zadržan na našem tržištu, tako je bilo i sa govedima iz Rumunije. Izvoz je stao, pale su cijene mesa, prije je bio kilogram žive vage junetine oko 5.20 KM, a danas je 4.20 KM - objasnio je Usorac.

Poljoprivrednici su u ljeto 2014. tražili od vlasti da se zabrani uvoz govedeg mesa i goveda iz Rumunije zbog, kako se tada navodilo, kravljeg ludila, međutim to se nije desilo. Iste godine je nakon poplava Turska dozvolila uvoz od 15.000 tona mesa na godišnjem nivou i po svemu sudeći to je zloupotrijebljeno.

-Ovo je posao za istražne organe i treba ga dovesti do kraja, ovim je ugled države narušen i treba da se kazne krivci zbog same države Turske. Tim činom bi pokazali ozbiljnost i zahvalnost. Ona je nas objeručke prihvatila i dozvolila po najpovoljnijim uslovima da radimo uvoz mesa, čime su bili prezadovoljni proizvođa-

či i izvoznici junadi. Ne treba da nam budu ogledalo neke barabe, najblaže rečeno, koje su zloupotrijebile dozvole za izvoz - oštro veli Usorac.

U 2015. godini iz BiH u Tursku izvezeno je mesa u vrijednosti od 100 miliona maraka, što je 10 puta više u odnosu na prethodnu godinu, podaci su Vanjskotrgovinske komore (VTK) BiH, koja izdaje dozvole o porijeklu mesa. Duljko Hasić, direktor Instituta za edukaciju VTK BiH, navodi kako je Turska tražila poštivanje propisa Evropske unije.

Ispitati cijeli slučaj

-Tim se podrazumijeva da VTK dobije izjavu privrednika u kojoj se kaže je li to domaći proizvod. To znači da on lično odgovara, uz izjavu potreban je i pasoš, tačnije ušna markica goveda što u konačnici znači da je domaći proizvod. Markicu izdaje Veterinarska uprava. I kada dođe u VTK kompletna dokumentacija izdaje se dozvola o porijeklu - rekao je Hasić.

Stav VTK je da trebaju istražni organi ispitati cijeli slučaj i da se oni koji su napravili propust i historijsku šansu bh. privrednika oštetili, da odgovaraju. **DŽENETA SARIĆ-KOZIĆ** Ovo je posao za istražne organe i treba ga dovesti do kraja, ovim je ugled države narušen i treba

da se kazne krivci zbog same države Turske. Tim činom bi pokazali ozbiljnost i zahvalnost

Page: 6

Reach: 0

Country: BOSNIA AND HERZEGOVINA

Size: 526 cm2

2 / 2

IZVOZ OD 2014.

Profitirali i aerodromi

Bescarinski izvoz mesa u Tursku, koji je počeo poslije poplava u BiH 2014. godine oživio je bh. aerodrome. S obzirom na to da BiH proizvode animalnog porijekla ne može izvoziti kopnenim putem, jer Evropska unija ne dozvoljava promet preko svoje teritorije, a put bi trebao voditi preko Bugarske, bh. mesarima je bilo ostalo da izaberu brodski ili avionski transport. Oni su se odlučili za avionski transport.



Pojedini izvoznici zloupotrijebili pogodnosti